

財政實業集論

財政實業集論

中華民國二年十月朔日印刷發行 (定價壹角五分)



著者
發行者

湖北楊汝梅

印刷處
順天時報社

發賣處
漢口英租界一碼頭
昌明公司

北京琉璃廠
文明書局
全

新學會社

財政實業集論小引

歲壬寅。余遊學東瀛。歷七稔返國。適承乏湖北商業學堂。與二三子切劘。思爲吾國實業倡。繼供財政審計各職。見各機關鈎稽綜核。改良會計。方之竄敗時代。蔑如也。嗟乎。吾國財力竭矣。實業敝矣。非整理財政。發達實業。其何能國。余生平所執行。所研究者。不出財政實業範圍外。第負性迂拙。不喜高談學理。而好實事求是。每有時事感觸。輒實地調查。得其確實。抒爲言論。竊比於醫家之對症方。顧南北橐筆。藁多散佚矣。檢行篋中。裒得若干篇。然皆隨得隨書。語無倫次。既非若史漢平準書。食貨志。爲專家著述。復不類賈誼治安策。賈山至言。爲干時條陳。出而問世。殊無取焉。迺者目擊時艱。欲秘不能。弗揣樛昧。爰擇其中之有關國是者。付諸手民。或可爲實事上之一助云。

中華民國二年十月朔日

楊汝梅予戒甫自識

財政實業集論目錄

楊汝梅撰

- 一、遊武漢勸業獎進會之感言
- 二、論中國商人之地位
- 三、調查南洋勸業會之評議
- 四、改良鐵路會計說
- 五、論湖北財政書
- 六、財政與實業商權書
- 七、加稅裁厘議
- 八、對於國會建議組織審計院之私評
- 九、論民國二年度豫算無正式成立之理由應另定變通辦法

財政實業集論

遊武漢勸業獎進會之感言

（時由前學部
試畢返鄂）

第一、總論

賽會之說。發源東亞。徵諸記錄。四千年前。波斯王詔其國富。蒐集國內珍品奇什。陳列首都。以供觀覽。是爲賽會之嚆矢。然循名核實。與今日賽會本旨相違。其完全賽會精神。以開今日先路者。實自一千七百五十六年英之倫敦賽會始。由是而法國賽會巴黎矣。俄國賽會聖彼得堡矣。美國賽會聖路易矣。日本賽會東京矣。此外若德、若蘭、若比。羣趨步是。羣獎勵是。迄今日幾乎無國無會。無年無會。而賽會遂爲實業競爭上之一重要機關。吾國自通商互市以來。已爲世界商戰競爭之中心點。漢口襟鐵路而帶長江。又爲全國交通之中心點。以言乎時勢。既如彼其迫切。以言乎地勢。又如此其便利。使於此而尙無準備競爭之策。是自棄也。夫自棄烏可以圖存也。此武漢勸業獎進會之所由發生也。特是不曰賽會。而以勸業獎進名者何耶。攷賽會一語。英語名曰

Exhibition 表示所列物品之意也。重在物品。其義取於客位。日語名曰博覽會者。重在觀覽之人。其義取於主位。今吾鄂定其名爲勸業獎進會。用意似別有在。所謂業者。何。即農業、工業、商業是。萃各種實業家所創造經營之物品於一處。比較其優劣。而勸勉之。而獎進之意。不在現在之物品。而在將來之物品。重在製造之人。其義取於客位中之主位。夫博覽會一語。原自英語譯出。而勸業會一語。又參合東西之用語而譯成者也。今其義乃從反面求之者。義蓋有二。⁽¹⁾東西洋之風俗習慣。不必強同。如西文用橫書。東文用直書之類是。⁽²⁾吾國賽會之時期雖熟。而產業之程度尙低。與其虛矜博大之名。而臨事竭蹶。寧循名責實。先自縮小其範圍之爲愈也。蓋事屬創舉。物品毫無統計之可查。果足以炫耀於人。而爲商戰之利器乎。未可知也。觀者之思想未新。或不免固執成見。果足以衡鑒物品之優劣。而藉資研究乎。未可知也。惟我實業家。各挾一求勝於人之希望。陳列其物品於會場。有陳列則有比較。有比較則有優劣。有優劣則有競爭。至於競爭心生。則一切改良進步。精益求精之心思。自蜂起泉湧而不可遏。能如此。則創辦者勸業獎進之責任盡矣。無庸徒矜物品之珍奇。徒襲博覽之名義爲也。

第二、評議

余今夏自東瀛歸來。滯省數日。即因事返鄉。對於勸業盛會。未嘗稍參末議。問心常覺歉然。月前在京都閱報。聞既開會矣。而觀者絡繹不絕。途爲之塞。非任事者籌畫精詳。其效果安能臻此。迭聽之餘。無任欽佩。近以事竣返鄂。思爭先快覩。以一擴其眼界。日前得暇往觀一次。五光十色。爭炫吾目。迴想十年前景象。相去若天淵然。吾國產業進步之速。固堪驚嘆。而任事者羅致之功。亦自不可掩也。觀止矣。勿庸余更贊一詞。然而人心不同。各如其面。遊覽一遍。覺其中有與鄙見不合者數事。有爲鄙意所贊賞者數事。不揣冒昧。分說於左。

(1) 陳列場構造。爲經理者最宜注意之點。務使陳列品一望即明。又必綽有餘地。使陳列者得盡其心思能力。然後可免顧此失彼之虞。本會爲撙節經費計。借用官棧舊房。原不能求全責備。然至經理者若能使各陳列室番號。有條不紊。亦足以便觀覽而補房屋構造之缺點。今觀會場中陳列室番號。顛倒錯亂。毫無次序。觀者稍粗心。即不免有顧此失彼之患。

(2) 出品標注。其文字固宜簡單。亦貴明晰。今觀浮籤上。僅印有物名。產地。出品人。製造者。價值。等文。而無用途二字。致觀者對於初見之物。徒羨其光怪陸離。而莫悉其用法。是亦一缺點。

(3) 吾鄂自張南皮翁創設織布紡紗縲絲製麻。四官局以來。進口貨爲所抵制者不少。故此四局製品。爲全國企業家所注目。竊意此四局物品。必能盡其種類。陳列會場。供人摹倣。今會場除製麻局二三出品外。他無所見。(如製麻局之全絲花緞絲麻花春紗絲麻本均堪與洋綢緞闊麻爭妍。可見名不虛傳) 豈該局承辦諸公。故祕之耶。抑本會經理諸公。漏探耶。

(4) 觀者精神。不能始終無倦。苟物物注意。往往觀至半途而其神已疲。似宜于中間。適當處。開一小茶館。兼賣食物。俾觀者稍爲休息。然後重振精神。可無忽略看過之憂。今會場無此佈置。亦一缺點。雖第六號有一小花園。然在入門甚近之處。人至此而神尙未疲。不便休息也。

(5) 到會觀者。多多益善。一則可以開通國民之知識。一則可以採衆口之評議。爲審查之參攷。然必於會中別添餘興補助之。始足引起一般人之動念。轉促來觀。吾見外國

賽會。往往於場內或場外。設有演藝場、奇術館、及水族館、動物園等餘興者。其用意實在於此。今會中花園內。亦置有二三珍異鳥獸。雖云不甚完備。亦會中餘興也。乃吾聞前數日有人評議曰。此等物不宜陳於會場內。而經理者竟大書於門內黑板答覆曰。此係遠方商人。不知賽會之性質而誤送來者。故爲陳列也云云。誤評之而誤答之。未免錯中之錯。

總之事屬創辦。缺點在所不免。但此外缺點。多屬他人所已指出者。故余不更贅云。抑余之所以細加評議者。非敢故爲謗言。以損經理者之名譽也。援春秋責備賢者之義。望之切故不覺責之殷。儻使賜不幸而言中。作爲後此賽會之芻議可也。

以下更就陳列各種物品。稍加批評。然學識謏陋如余。僅憑半日目力。欲舉萬有不齊之物。細加評議。恐掛一漏萬。勢所不免。若指鹿爲馬。心又弗安。惟僅就當日觀覽時。所最注意數種物品略評之。至分門類而精核良窳。定等第而優給獎勵。則審查諸公之責任。安用余之代庖哉。

(甲) 中國貨與外國貨之比較

湖北兵工廠軍械。陸軍工廠洋式皮靴。武昌製皮廠洋式皮箱等。類能摹倣西式。使於此更求進步。足以抵外貨而塞財政之漏卮。此外如製麻局。武昌工藝實習廠。善技塲。漢口勸工院。及一二私立公司等。出品中不乏倣造外洋貨物而得其精神者。且定價之廉。亦不讓外國貨。將來銷路。正自未可限量。

注：就布類言之。如製麻局花緞麻布。工藝實習廠藍元斗紋柳條布。五彩麻紗被面。善技塲棹幃被面。以及漢口膠布。斗紋掛花布。絲光錦布。提花布等。皆將來易於銷行之物。就器械論之。如工藝廠藤棚。鋼絲等鐵床。軋花。壓布。磨粉。造洋燭等機器。以及漢口勸工院藤篾等器。均屬銷行有望之物。

綢緞爲吾國布中精華。價雖昂而決不至爲外貨所壓制。蓋廉價之洋綢緞。往往美麗。其外。應敗其中。無耐久性質故也。吾嘗調查日本三越吳服店矣。其緞絹諸物之佳者。定價較吾國綢緞。幾高一倍。審乎此。則吾國業此者。苟能於織花着色等事。再加改良。雖價值稍昂。亦不至妨其銷路也。又湖南瀏陽夏葛。亦吾國特有物產。

其如杭州寧波綾緞。湖縐等。漢口鏡地花緞。織紋花軸等。以及南京漳緞。漳絨等。均屬我國重要特產物。此外如荊州五彩三藍被面。亦復光艷奪目。不減洋緞。惟河南縐。色鈍而質弱。不加改良。難望銷路之廣。

磁器向以江西爲最佳。今觀其陳列會塲者。無一嶄新奇拔物。宜斯業日就頹敗。漸爲

洋磁壓倒也。湖南醴陵瓷器。其花紋頗有別致。將來能與洋瓷競爭者。其湖南瓷業公司乎。京都景泰藍瓷器。裝飾精巧。色澤艷麗。價值不在日本七寶器下。而成本較輕。將來必爲出口貨一大宗。業此者勉之可也。又天津實習工廠細綵吹藍色磁器。亦稱佳構。

(乙) 本省貨與他省貨之比較

教育品以理化器械爲最重要。然吾鄂理化器械。悉購自外洋。不必陳列直隸特別室內。雖陳設數種。亦寥寥若晨星。然惟圖畫多而佳構亦復不少。是爲鄂中教育美術品之特色。

木工彫刻之佳。羣注意于寧波嵌花鹿床。及牙嵌鏡箱等物。然鄂人黃鶴樓模型。其鉤心鬬角之巧。可許其步趨歐美製造家。而人之床。似乎尙遜一籌。

天津實習工廠及鐵工廠出品。頗多可觀。以視鄂中各局廠製造。互有短長。未易軒輊。惟天津有教育品製造所。鄂中則無。吾鄂學堂林立。而教育品製造。專仰給于外人。豈非財政上一大漏卮乎。

刺繡之工。推湘繡第一。蓋繡法與畫法同。徒裝飾花卉之色。不能得花卉之神。可以炫俗人目。未足壯雅人觀也。湘繡惟知此意。故其品格在蘇繡鄂繡之上。

漢口勸工院花瓶茶壺烟帶筒等物。摹倣京都景泰藍。尙未得其真意。苟勉力爲之。終必有酷肖之一日。廣東籐床籐椅。較勸工院籐篋諸器。尤覺工緻。

山東玻璃絲鳳凰瓶。及鋪絲風燈。尙覺工緻可愛。足供飾品之用。儻成本不高。令吾人仿而製之。當不患無銷路。

此外成本太貴而不適於用之物。如江西紋銀彫刻器等類是也。嘗見吾鄂銀爐。亦喜製此等器具。余竊爲不取焉。蓋研究工業上之競爭。當以最少成本。製成最大效用之器具。乃克有濟。如攪麻於絲以織緞。製紙爲皮以成靴。皆此意也。今乃全反此公例。愚亦甚矣。

第三、結論

登高自卑。行遠自邇。辦事定例也。賽會何獨不然。是故從賽會種類論之。由專門賽會。進而爲普通賽會矣。從賽會範圍論之。由地方賽會。進而爲全國賽會。更進而爲萬國

賽會矣。今武漢勸業獎進會普通賽會也。地方賽會也。吾鄂人創設斯會之本旨。在以斯會示其模範。實業家對於斯會。規畫不計。以斯會滿其志願。天下事。嘗有造因小而結果大者。今日武漢勸業會。實業進步之造因也。他日吾國所開之萬國賽會。即實業進步之結果也。斯會關係吾國之實業進步也。大而遠。故吾人責望於斯會也。重以周。不然。凡事難於創始。即徵之歐美賽會史。其初亦多因陋就簡。吾又何必獨責斯會也哉。吾聞法之初開會于巴黎也。法王拿破崙。自爲總裁。招待出品人。大宴三日。以慰勞之。當時出品者不過百十人。而法王選九人爲審查官。詳加審查。優給獎勵。此會結果。遂使法國美術製作勃興。而英國大受其打擊。今茲勸業會。其出品之不完全。與夫規劃之未盡善。亦不過與當日巴黎賽會等耳。而在上者提倡之熱心。不減於法王。倘於閉會時。慎重審查。優給獎勵。以無負出品者盛意也。則吾國實業界前途。幸甚。備攷。按武漢勸業會之內容。余曾率同商堂學生諸君。編有分類調查筆記一冊。由湖北教育官報刻印發行。附誌於此。以爲研究國內商品者介紹焉。

